

DIDZA' RUZÉAJNI'I YUGU' BÖNACHI HEBREO

Dios bé'lenë' rë'u didza' lu ru'ë Zxí'ini cazë'

1 ¹ Zián luzuí, en zían ca benë' Dios, bé'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. ² Na'a, ga ruúdxí xtídzë'ë, dza ni zóaru' na'a, Dios bé'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. ³ Zxí'inë' na' náquië' ca tu le ruluí'i lahui yöl-la' zxön queë' Dios, en ca náquië' Zxí'inë' ruluí'i lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yøjchö'ë cuita lë'ë ibëla Dios, Nu rö'ö rinná bë' xitsá'tërö.

Zxí'inë' Dios nayépisëtërë' ca yugu' gubáz lá'ayi

⁴ Zxí'inë' Dios nayépisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. ⁵ Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë':

Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

⁶ Lësca' caní, cate' Dios buzóë' Bi'i que cazë' lu yödzölió ni, gunné':
Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácagaquië' gubáz lá'ayi queë', rnna:

Lë' runë' ga nácagaquië' gubáz lá'ayi queë' ca bö' recja,
ate' gubáz lá'ayi huen dxin queë', runë' ga nácagaquië' ca guí'.

⁸ Na'a, ca naca cazë' Zxí'inë', rnnë':

Ga rö'u rinná bë'u, inná bé'tica'su', Dios.

Tsahui' naca ca rinná bë'u.

⁹ Nadxí'ínu' le naca tsahui', en calëga le ruá' dö'.

Que lë ni na' Dios budödë' lu no'o yöl-la' unná bë',
en benë' ga ruzí'itëru' Li' xibé yöl-la' unná bë'
ca le tu'zí'i xibé luzó'o.

¹⁰ Lësca' caní rnnë':

Li', Xan, cate' gusí lo, benu' yödzölió,
ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itëbigaca ca ritëbi lari',

¹² en ca lari' utubu' léguequi, en utsó'o léguequi,

pero Li', catu caz utsá' cuinu'
en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxí'inë',
gunné':

Guró'ö cuita lë'a ibëla
cate' gunra' ga ulu'zechu zxíbigaca lo'
nupa biti' ta'lé'e Li' dxi'a.

¹⁴ Yúgu'të gubáz lá'ayi queë' Dios nácagaquië' bö' huen dxin queë'
Dios, ate' nasól-lë'ë légaquië' para ilácalenë' nupa ni nulágaca.

Biti' ral-la' ucá'anaru' cá'asö yöl-la' rusölá

2 ¹ Que lë ni na', ral-la' güí'i ládxi'röru' le chibiyóniru', para cabí
gaca chopa ládxi'ru'. ² Guca bë' naca idútë li didza' na', le bidxín
dza ni'te lu ná'agaquië' gubáz lá'ayi queë' Dios, ate' yúgu'të nupa
gula'dödi bë' ca rnna didza' na', en biti' gulún ca rnna, Dios benë'
léguequi xíguia' ca na' röjlóz le gulúngaca. ³ Lësca' caní biti' ca' uláru'
rë'u lu xíguia' na' channö ucá'anaru' cá'asö yöl-la' rusölá ni, le benë' Lë
cazë' Xanru' libán que zí'alö, ate' nupa bila'yöni Lë' bulu'luí'i rë'u naca
idútë li. ⁴ Lësca' caní Dios caz benë' tsözxón légaquië' ba nalí, tu' benë'
le nácagaca bë', en le tun ga rubániru', en yugu' yöl-la' huáca zxön.
Gudísië' ca' yugu' le runödzjë' Dios Bö' Lá'ayi quégaquië' tsca gú'uni
quézinë' Dios.

Dios benë' ga böáquië' Jesús idú ca nácaru' rë'u

⁵ Dios biti' budödë' yödzölió si' za' lu ná'agaquië' gubáz lá'ayi que
yehua' yubá queë', lë na' ruí'iru' didza' que. ⁶ Na'a, ca naca lë ni, nazúaj
lu guichi lá'ayi didza' bë' nu run ba nalí le rnna:

Dios, rubánide'eda' tu' ruí'i ládxi'u bö'nachi.

Rubánide'eda' tu' rácalenu' léguequi.

⁷ Ia'láti'sö cá'asö ca yugu' gubáz lá'ayi que yehua' yubá quiu' benu'
bö'nachi.

Buzú' quéguequi yöl-la' zxön, en yöl-la' run bal,
en budödu' yúgu'të le benu' Li' lu né'eguequi.

⁸ Yúgu'të budödu' lu né'eguequi para ila'nná be'e le.

Nazúaj lu guichi lá'ayi lë na' rnna: “Budödu' lu né'eguequi yúgu'të.”
Biti' bi bucá'anë' le cabí budödë' lu né'eguequi, pero ga ridxintë na'a
dza, biti' rilé'eru' yu'u lu né'eguequi yúgu'të. ⁹ Réquibe'eru' le guca
queë' Jesús. Tu chí'isö, Dios benë' ga böáquië' ia'láti'sö cuidi' ca yugu'
gubáz lá'ayi que yehua' yubá queë'. Guljë' bö'nachi para gútië', ate'
gudí'i guzxáquë'ë Jesús lu yöl-la' guti uláz quégaca yúgu'të bö'nachi, tu'
buzá' ládxië' Dios queëru' caní. Tu' benë' Jesús caní, Dios benë' ga rata'
queëru' yöl-la' zxön, en yöl-la' run bal.

¹⁰ Dios benë' yúgu'të le rilé'eru', en runë' ga nacuá'tica'sö. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudí'i guzxáquë'ë. Caní benë' Dios queë' Cristo, Nu bideli' yöl-la' rusölá para gaca iché'ë bönachi zían yehua' yubá queë'. ¹¹ Cristo ruúnë' tsahui' bönachi para ilequi quez queë' Dios. Tuzë' náquië' Xúzguequi nupa na' ruúnë' Cristo tsahui', en Xuz cazë'. Que læ ni na', biti' ca' rutuí'inë' Zxí'inë' Dios cate' rnnë' nácagaquië' böchi' luzé'ë. ¹² Ca naca læ ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',

gul-la' yöl-la' ba quiu'.

¹³ Lësca' caní rnnë':

Uzxöni ládxa'a-në' Dios.

Ga yúbölö nazúaj le rnnë':

¡Buli'yútsöca' neda', en yugu' zxí'inë',

nupa na' Dios bennë' quia'!

¹⁴ Que læ ni na', tu' néquiguequinë' bëla' en rön yugu' zxí'inë' na', lësca' caní Cristo ben cuinë' ca nácagaquië'. Guljë' bëla' en rön. Caní guljë' para guca gútië', en caní guca busunítië' yöl-la' huáca unná bë' que tu' xihui', nu na' dë lu në'e guti bönachi. ¹⁵ Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacuá' nabángaca, tu' guladxi yöl-la' guti. ¹⁶ Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxí'ini xi'söë' Abraham. ¹⁷ Que læ ni na', ben bayudxi böáquië' Cristo idú ca nácagaquië' böchi' luzé'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládxë'ë bönachi, enca' para gunë' le gun ga gata' lu në'ë ugúë' dul-la' nabága'gaca bönachi. ¹⁸ Na'a, tu' gudí'i guzxáquë'ë Lë cazë' Cristo, ate' guzxí' bë' tu' xihui' Lë', que læ ni na' napë' yöl-la' huáca gácalenë' nupa ni, rizí' bë' tu' xihui' léguequi.

Jesús nayépisëtërë' ca Moisés

3 ¹ Que læ ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo.

Náquië' gubáz nasól-lë'ë Dios, enca' bixúz lo que le nazí' lu ná'aru'.

² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi

queë' Dios. ³ Nayépisëtërë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'.

⁴ Yúgu'të yu'u, zoa nu ben le, pero Dios náquië' Nu ben yúgu'të le rilé'eru'. ⁵ Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba

nalí que didza' ral-la' gu'ë Dios, ⁶ pero Cristo runë' ca rnna xtídzë'ë Dios,

en náquië' Zxí'ini cazë', ate' nacuá' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzéjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

- ⁷ Que lë ni na', nazúaj lu guichi ca rnnë' Dios Bö' Lá'ayi le rnna: Na'a, channö riyónili' didza' ru'ë Dios,
⁸ biti' gácali' zidi lu icja ládxi'do'oli' ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asö.
⁹ Gula'zí' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.
¹⁰ Que lë ni na' guléda' bönachi dza ni', en gunnía': "Ta'chíxítica'sinë' ca ta'zá' ládxi'gaquië'. Biti' té'ënnë' ila'nózinë' le ré'ënda' ilunë'."
¹¹ Que lë ni na' guléda' légaquië', en bena' tsutsu xtídza'a, gunnía': "Biti' ila'yázië' ga ulu'zí' ládxi'gaquië' tsözxón len neda'."
¹² Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë'ë, en para cabí usanli'-në' Dios ban.
¹³ Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴ Yúgu'tëru' gunru' tsözxón Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.
¹⁵ Caní ral-la' gunru' tsanni ni rnna: Na'a, channö riyónili' chi'ë Dios, biti' gácali' zidi lu icja ládxi'do'oli', ca na' gulaca nupa ni' gula'dá'baga' Dios.
¹⁶ ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. ¹⁷ ¿Nupxi na' gulënë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. ¹⁸ ¿Nupxi ni' benë' tsutsu xtídzë'ë Dios, gunné' biti' ila'yaza ga ulu'zí' ládxi'guequi tsözxón len Lë'? Gulaca nupa ni' biti' gulún ca rnna xtídzë'ë Dios. ¹⁹ Na'a, réquibe'ëru' biti' guca ila'yázië' tu' cabí gula'yéajlë'ë Dios.

4 ¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'. ² Biyönrü' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le. ³ Rë'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunné' Dios:

Que lë ni na' guléda' légaquië'
 en bena' tsutsu xtídza'a, gunnía':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzölió ni, en chiruzí' ládxi'ë.

⁴ Nazúaj lu guichi lá'ayi ga ruí'i didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." ⁵ Ga yúbölö rnna: "Biti' tsú'ugaquië' ga ulu'zí' ládxi'lenë' neda'." ⁶ Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'. ⁷ Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zián, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónili' didza' ru'ë Dios,
biti' gácali' zidi lu icja ládxi'do'oli'.

⁸ La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'. ⁹ Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. ¹⁰ Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. ¹¹ Que lë ni na', ral-la' güí'i ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlë' Dios, en biti' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ruí'i. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'.

¹³ Biti' bi gaca ucáchi'ru' ga biti' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

Jesús náquië' bixúz lo, Nu nácatërö zxön

¹⁴ Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. ¹⁵ Zoa queëru' tu bixúz lo, Nu gaca huéchi' ladxí' rë'u ca nácgaca le raca queëru', tu' guzxí' bë' tu' xihui' Lë cazë' idútë ca na' rizí' bë' tu' xihui' na' rë'u, pero biti' bi dul-la' benë' Lë'. ¹⁶ Que lë ni na', idú ládxi'ru' ral-la' ibíga'ru' gala' ga rō'ë rinná bë'ë Dios, Bönni' ruzá' ladxë'ë queëru', en inábaru' lahuë' huéchi' ládxi'ë rë'u, en uzá' ládxi'ë queëru', para gácalenë' rë'u cate' bi raca queëru'.

5 ¹ Dios ribó cazë' núti'tës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bēdxi tútigaquië'-ba' lu bucugu lá'ayi tu' nözi dul-la' nabága'gaquië'. ² Bixúz lo na', tu'

raca quee' lëbisö ca raca quégaca bönachi, gaca gáquië' zxön ladxi' len nupa nácgaca yugu' bönni' canöz, en nupa ta'chixi ta'nigui. ³ Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tütigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

⁴ Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. ⁵ Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzóa' Li' na'a.

⁶ Lësca' caní gudxë' Lë' le nazúaj ga yúbölö, gunné':

Li' nácatuca'su' bixúz,

ca na' gúquië' Melquisedec bixúz.

⁷ Cristo, cate' ni' zoa cazë' yödzölió ni, bulidzë' Dios, en gúta'yuë' lahuë'. Guródxi'ë, en gurödxë' lahuë' Dios, Bönni' guca usölë' Lë' lu yöl-la' guti, ate' Dios biyönnë' Lë' tu' gúdxinë' Lë' idú ládxë'ë. ⁸ Sal-la' gúquië' Zxí'inë' Dios, bizédë' gunë' ca rnna xtídzë'ë Dios tu' gulaca queë' yugu' le gudí'i guxzáque'ë. ⁹ Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rnna xtídzë'ë. ¹⁰ Ní'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

Zoa bönadxi queëru' huóaj ládxi'ru', en tá'baga'ru'-në' Cristo

¹¹ Ca naca lë ni, zían le ral-la' güí'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'. ¹² Chigudödi dza ral-la' gaca usédili' bönachi xtídzë'ë Dios, tu' chibiyónili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i hué'ënido' ta'quínibi' nidxi', en calëga la' huagu tsutsu. ¹³ Yúgu'të bönni' naquíniguequinë' nu usedi légaquië' lë na' biti' naca böniga, nácgacaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'. ¹⁴ La' huagu tsutsu tu'zí' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

6 ¹ Que lë ni na', biti' ral-la' usédatica'siru' yugu' xibá buzédaru' cate' si' gusí lo riyóniru' ca naca queë' Cristo. Ral-la' tsöjnóröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i ládxi'ru',

en ca bítirö gunru' le ruá' dö',

en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i ládxi'gaca leyúbölö nupa tu'huóaj ladxi', en ta'dá'baga' Dios? Channö bidxín quéguequi bení' queë' Dios, en bulu'zí' xibé le runödzjë' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxi'a queë' Dios en yöl-la' huáca que dza si' za', en channö ní'irö tu'huóaj ladxi', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxi'inë' Dios lë'e yaga cruz en ilún tsca ulu'titaj Lë' lahui' lógaca bönachi. ⁷ Nupa tun caní nácagaca ca yu na' ruzí' xibé nisa guió'j le ribixi láhuilö zían luzuí. Channö yu na' runödzaj le tu'zí' xibé nupa tá'ana yu na', raza ládxi'ë Dios le, ⁸ pero channö ruzóasö yu na' lubá yötsi', en bësigá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zí' xibé nupa nulágaca. ¹⁰ Dios náquië' tsahui', en biti' gal-la ládxi'ë dxin tsahui' benli', en yugu' le benli' tu' nadxí'ili' Lë'. Gúcalenli' nupa néquiguequi quez queë' Dios, en runli' xichínguequi. ¹¹ Na'a, ré'ënitú' güi'i ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lë na' runli' löza.

¹² Ré'ënitú' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön ladxi', para idéli'li' yugu' le guzxí' lu në'ë Dios gunnë' queëru'.

¹³ Caní gaca, tu' benë' tsutsu Dios xtídzë'ë cate' guzxí' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë. ¹⁴ Caní gunné' Dios: "Le nácate guna' ga gaca dxi'a quiu', en guna' ga ila'yánda'abi' zxí'ini xi'sú'." ¹⁵ Gulözë' Abraham zxön ladxi', ate' bidéli'në' le guzxí' lu në'ë Dios gunnë' queë'. ¹⁶ Cate' tu bönni' runë' tsutsu xtídzë'ë, ruzötjë' nu nácaterö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë. ¹⁷ Que lë ni na' Dios benë' tsutsu le guzxí' lu në'ë gunë', en buzöta'j cuinë', tu' gú'unnë' ulu'ínë' nupa ulu'zí' xibé le guzxí' lu në'ë unödzjë' quéguequi, nácada' löza, en tsaz naca le nuzóa lahuë' gunë'. ¹⁸ Le guzxí' lu në'ë Dios, en le benë' tsutsu, chopá ni catu caz idzá'gaca, en ca naca quégaca chopá ni, biti' gaca si' yë'ë Dios. Caní benë' Dios para gácada' löza queëru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunné' sí'iru'. ¹⁹ Lë na' runru' löza ruzóatica'sö tsutsu icja ládxi'do'oru', en naca ca tu du guíë ruzóa dxisö barco. Lë na' runru' löza run chí'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu

yudo' rō'ō yehua' yubá. ²⁰ Guyáziē' Jesús uláz queēru' ca Nu rōjnōru loru' ga ni' zoē' Dios, ate' Dios nuzōē' Lē' náquiē' tsaz bixúz lo ca na' gúquiē' Melquisedec bixúz lo.

Jesús náquiē' bixúz lo ca gúquiē' Melquisedec

7 ¹ Melquisedec gúquiē' bōnni' na' gunná bē'ē lu yōdzō Salem, enca' bixúz queē' Dios, nayēpisētērē'. Cate' suzē'ē Abraham, sōhuōjē' gudōdi guca gudil-la cate' bucul-lē' yugu' bōnni' ta'nná bē'ē, birúajē' Melquisedec na', yōjtságuiē' Abraham, en gunábinē' Dios gun lá'ayē' Abraham. ² Abraham bē'ē queē' tu cō' tu' chi cō' que yúgu'tē le bidéli'nē' lu gudil-la na'. Ca lē' Melquisedec na' rnna lu didza' xidza': "Bōnni' Unná Bē' Tsahui'", en náquiē' ca' Bōnni' unná bē' que yōdzō Salem, le rnna lu didza' xidza': "Bōnni' Unná Bē' Ribequi Dxíē'." ³ Biti' zoa lu guichi le rnna gula'cu'ē xuz xinē'ē, o xuz xtá'ahuē', en biti' nazúaj dza guljē' o dza gútiē', pero náquiē' ca náquiē' Zxí'inē' Dios tu' náquiē' tsaz bixúz lo.

⁴ Buli'yútsōca' na'a, ca na' gúquiē' zxōn Melquisedec na', tu' lē cazē' xúziru' Abraham bē'ē queē' tu cō' tu' chi cō' que lē na' guléajē' lu ná'agaquiē' bōnni' ta'nná bē'ē ni' bucul-lē' lu gudil-la. ⁵ Lu xibá queē' Moisés, Dios rinná bé'enē' yugu' zxí'ini xi'sóē' Leví, nupa nácagaca bixúz, ila'zi'ē tu cō' tu' chi cō' que le ta'zí' bōnachi Israel, sal-la' nácagaca di'a dza quégaquiē', tu' nácagaquiē' yúgu'tē' zxí'ini xi'sóē' Abraham. ⁶ Melquisedec na' biti' náquiē' di'a dza quégaquiē', pero guzxi'ē tu cō' tu' chi cō' lu nē'ē Abraham, nu na' bideli' yugu' le guzxi' lu nē'ē Dios gunnē' queē'. Lēscā' Melquisedec na' gunábinē' Dios gun lá'ayē' Abraham, ⁷ ate' cuntu nu gaca tá'baga' lē na' rnna: Nu nadéli'rō lahuē' Dios rinábini Dios gun lá'ayē' nu nacuídi'rō. ⁸ Na'a, dza ni zóaru' na'a, nupa ta'zí' tu cō' tu' chi cō' lu ná'agaca bōnachi nácagaca ca' bōnachi tati caz, pero Melquisedec na', zoa le run ba nalí queē' le rnna zoē' nabanē'. ⁹ Na'a, huáca innaru' queē' Leví, en quégaca zxí'ini xi'sóē', nupa na' ta'zí' tu cō' tu' chi cō' lu ná'agaca bōnachi, lēscā' gula'guízxjē' tu cō' tu' chi cō' cate' ni' Melquisedec na' guzxi'ē tu cō' tu' chi cō' lu nē'ē Abraham, xuz gula gudōdi quégaquiē'. ¹⁰ Caní naca, tu' huáca innaru' Abraham ni' nu'ē lē'ē Leví, en yugu' zxí'ini xi'sóē' cate' ni' yōjtságuiē' Melquisedec lē', tu' cabí náljaniguequinē'.

¹¹ Ta'zí' bōnachi Israel xibá gunná bē'ē Moisés lu ná'agaca bixúz, nupa nácagaca zxí'ini xi'sóē' Leví ga nababē' ca' Aarón, bixúz lo. Na'a, la'tu' guca ulu'huōáca bōnachi idú tsahui' lahuē' Dios tu' tun ca rinná bē' xibá queē' Moisés, biti' ben bayudxi soa ia'túē' bixúz ca gúquiē' Melquisedec, en calēga ca gúquiē' Aarón. ¹² Channō rutsē'ē Dios ca ral-la' gáquiē' bixúz, run bayudxi utsē'ē ca' ca naca xibá queē'. ¹³ Xanru', Nu na' nazúaj lu guichi ca naca queē' yugu' lē ni, nababē' ia'turō cō' zxí'ini xi'sóē' Israel ca le nababē' Leví na', ate' que cō' zxí'ini xi'sóē' ga nababē'

Xanru', cuntu nu guca bixúz lahuë' Dios. ¹⁴ Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

¹⁵ Nácatërö bë' lë ni ni'a que le raca na'a. Ca na' gúquië' Melquisedec bixúz, chibuluí'i lahuë' ia'turë' bixúz, Jesús. ¹⁶ Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxí. ¹⁷ Nazúaj lu guichi lá'ayi le run ba nalí queë' le rnna:

Tsaz nacu' bixúz

ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun. ¹⁹ Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë.

²¹ Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídza'a neda', Xanu', gunnía':

“Biti' utsá'a ca guna'.

Tsaz nacu' bixúz

ca na' gúquië' Melquisedec bixúz.”

²² Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. ²³ Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulátië', ²⁴ pero tu' zóatica'së' Jesús, tsaz náquië' bixúz, en biti' gaca nu huöáza xilatjë' para gaca bixúz. ²⁵ Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxón bönachi dul-la', pero nayépisëtërë' ca yúgu'të le nacuá' ni' yehua' yubá. ²⁷ Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichón cazë' tu' nözi dul-la' nabága'gaca yúgu'të bönachi. ²⁸ Lu xibá queë' Moisés bönachi biti' nácacaca idú dxi'a nácacaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

Jesús náquië' Bixúz Lo queëru'

8 ¹ Na'a, ca rnna læ na' si' gunnía', naca caní: Zoa queëru' tu Bixúz Lo caní. Gurö'ë cuita læ'ë ibëla Dios, ate' rö'ë, rinná bë'ë yehua' yubá ni'. ² Lë' runë' dxin ca Bixúz Lo lu lataj nácatëro lá'ayi, le naca yudo' le naca idútë, læ na' buchisë' Xanru', en calëga bönachi. ³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichóngacaba' böa' bëdxi lahuë' Dios. Que læ ni na' ben bayudxi soa bi gulu'ë Cristo lahuë' Dios. ⁴ La'tu' zoë' luyú ni, biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. ⁵ Yugu' bixúz ni tunë' dxin que tu le ruluí'isö, en le naca ca tu bixín que læ na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca læ na' buluí'ida' li' lu guí'a ni'." ⁶ Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lë' zoa tu didza' rucá'ana tsahui' queëru' le nácatëro lesaca', en le ruí'i didza' que le nácatëro lesaca' guzxí' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. ⁸ Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na', læ na' bénlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto. Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

¹⁰ Que læ ni na', caní gaca didza' ucá'ana tsahui' gúnlena' bönachi Israel tödi yugu' dza ni', rnnë' Xanru'. Uchízia' icja ládxi'do'gaquië' xibá quia' en uzúaja' le lu icja ládxi'do'gaquië'. Ní'irö gaca' Dios quégaquië' ate' légaquië' iláquië' bönachi quia'.

¹¹ Biti' gun bayudxi nu usedi luzé'e, inná: Bénbë'ë Xanru', tu' ilúnbë'ë yúgu'të' neda', ga isí lo nu naca cá'asö, ga idxintë nu naca lo.

¹² Huéchi' ládxa'a légaquië',

en uniti lahua' le cabí naca tsahui' gulunë',
 en bíti'rö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula læ na' guzóa zí'alö, ate' chizóa idúa læ na' nagula, en chinaca gulasi.

Lataj lá'ayi dë luyú, en lataj lá'ayi dë yehua' yubá

9 ¹ Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. ² Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios. ³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, ⁴ ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, læ na' bubó' ni'a n'ë'e, enca' yugu' guió'j blaga na', nazúaj láhuilöguequi didza' rucá'ana tsahui'. ^{5,6} Lahui guí'ina na' gula'cuá' chopa gubáz lá'ayi néquiguequini oro, légaca querubín que lataj ga buluí'i lahuë' Dios, ate' bulu'zxóa xíliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' læ ni. Biti' dë lataj uzúaja' na'a idútë ca nácagaca læ ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. ⁷ Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. ⁸ Caní ruzéajni'inë' Dios Bö' Lá'ayi rë'u, biti' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, læ na' bidzága didza' rucá'ana tsahui' le guzóa zí'alö. ⁹ Yugu' læ ni naca tu le ruluí'isö que le raca na'a dza. Yugu' le gula'gu'ë lahuë' Dios, en rön quégacaba' böa' bédxi na' gulútië'-ba' lahuë' Dios biti' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní. ¹⁰ Yugu' læ ni buluí'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' læ ni buzóë' Dios quégaquië' ga bidxintë dza ral-la' utsé'ë yúgu'të.

¹¹ Na'a, chibuduluí'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en biti' néquini lu ni'a lu ná'agaca bönachi, en biti' naca que luyú ni. ¹² Na'a, chiguyázië' Cristo lu lataj lá'ayi na', calëga len xichóngacaba' bédxido', en xichóngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. ¹³ Le nácatë xichóngacaba' bédxi, en chivo, en dö

queéba' bédxido' bulu'zégui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. ¹⁴ Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

¹⁵ Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugüë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégaquië' bönni' bulidzë', le zóatica'sö. ¹⁶ Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. ¹⁷ Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. ¹⁸ Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le ruluí'isö zoa nu guti. ¹⁹ Cate' ni' gudíxjöi'inë' Moisés bönachi ni' ca nácagaca yúgu'të xibá queë' Dios, gudélë'ë rön quégacaba' bédxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi. ²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." ²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. ²² Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le ruluí'isö ca naca lë na' rë'ö yehua' yubá, pero ca naca lë na' rë'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichóngacaba' böa' bédxido' caní. ²⁴ Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le ruluí'isö ca naca le naca idú, pero guyázië' yehua' yubá caz para gaca ulu'i lahuë' na'a lahuë' Dios uláz queëru'. ²⁵ Bixúz lo zoë' luyú ni razië' lataj nácaterö lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zían luzuí para udödi cuinë' lahuë' Dios. ²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzülió ga ridxintë na'a dza, pero na'a cate' naca dza údxi, tsaz bulu'i lahuë' tu luzuísö, en budödi cuinë' lahuë' Dios, cate' gútië' para bugüë' dul-la' nabága'ru'. ²⁷ Ca na' run bayudxi ilátigaca bönachi

tu luzuísö ate' tödi ni' uchi'a usöröë' Dios léguequi, ²⁸ lësca' caní, gútië' Cristo tu luzuísö, cate' budödi cuinë' lahuë' Dios para bugüë' dul-la' nabága'gaca bönachi zían. Na'a, uluí'i lahuë' le buropi luzuí, calëga para ugüë' dul-la', pero para usölë' tsaz nupa ta'böza Lë'.

10 ¹ Xibá na' gunná bë'ë Moisés guca tu le ruluí'isö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bédxi, lë na' gula'gú'utica'së' lahuë' Dios yugu' iz. ² La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huöáquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichóngacaba' bédxi, en chivo ugúa dul-la'.

⁵ Que lë ni na', cate' bidxinë' Cristo yödzölió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bédxi lo' pero benu' ga naca' bönáchisö.

⁶ Biti' raza ládxi'u nu uzegui'-ba' böa' bédxi lo', o nu cu'u xichóngacaba' lo' tu' nözi dul-la'.

⁷ Ní'irö gunnía': Ni zoa' para guna' ca ré'ënu' Li', Dios.

Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bédxi lahuë'." Didza' ni ruluí'i rë'u bíti'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. ⁹ Gudödi ni' rnna: "Ni zoa' para guna' ca ré'ënu' Li', Dios." Didza' ni ruluí'i rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxí'ini cazë' lahuë'. ¹⁰ Na'a, Dios ruúnë' rë'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichóngacaba' böa' bédxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zechu zxíbigaca lahuë' nupa biti' ta'lé'e Lë' dxi'a. ¹⁴ Ni'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

¹⁶ Caní gaca didza' ucá'ana tsahui' gúnlena' légaquië'

tödi yugu' dza ni', rnnë' Xanru'.

Uchízia' icja ládxi'do'gaquië' xibá quia',

en uzúaja' le lu icja ládxi'do'gaquië'.

¹⁷ Gudödi na' gunné':

Bíti'rö tsöjneda' dul-la' nabága'gaquië'
en dö' biá'gaquië'.

¹⁸ Que læ ni na', channö chinadúa dul-la', bíti'rö run bayudxi nu bi
cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios
caz, ni'a que xichönë' Jesucristo. ²⁰ Tséajlenru' tu nöza cubi, en idú
tsahui' le nuzóë' Cristo, le ridxín cúdzi'lö lari' na' busayaj ga nu riyaza
lataj idú lá'ayi na', o huáca innaru', nöza na' gusaljë' Cristo ni'a queëru'
tu' budödë' idútë le naca cazë'. ²¹ Jesús náquië' queëru' tu bixúz
nayépisëtërë', en rinná bé'enë' bönachi queë' Dios. ²² Que læ ni na'
huáca ibíga'ru' gala' ga zoë' Dios idú ládxi'ru', en lu yöl-la' run löza
queëru', tu' réajlë'ëru' Cristo, tu' chibunë' dxi'a icja ládxi'do'oru', para
cabí uxösa ládxi'do'oru' rë'u, ate' gudibë' idútë le naca cázaru' len le
naca tu nisa nácatërö idú. ²³ Ral-la' gácaru' tsutsu, en cabí gaca chopá
ládxi'ru' ca naca le runru' löza que le nazí' lu ná'aru', le guzxí' lu në'ë
Dios gunné' queëru', ate' Lë' runë' ca rnnë'. ²⁴ Ral-la' utipa ládxi'ru'
turu' ia'turu', para gunru' ga idxí'iröru' luzá'aru', en gúnrröru' ca' le naca
tsahui'. ²⁵ Bal-la bönachi bíti'rö tu'dubi len rë'u. Biti' ral-la' gunru' ca
tun bönachi na', pero ral-la' utipa ládxi'ru' turu' ia'turu', en gúnrröru'
caní tu' rilé'ëru' chizóa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idútë li,
biti' ca' nagá'ana bi gaca cú'uru' lahuë' Dios le ugúa dul-la'. ²⁷ Yugu'
bönni' tunë' caní, lu yöl-la' radxi ridzöbi quégaquië' ta'bözë' dza
ichúguië' Dios quégaquië' ila'yázië' lu guí' gabila, læ na' uzéguitica'sö
nupa ta'dá'baga' Dios. ²⁸ Cate' nu bönni' buzóë' xibá queë' Moisés
tsölá'alö, gulútië' lë' channö chopá tsonna bönachi gulún ba nalí que le
benë', ate' cuntú nu buéchi' ladxi' bönni' na'. ²⁹ Na'a, nu bönni' uzóë'
tsölá'alö Zxi'inë' Dios, en uzóë' tsölá'alö ca' xichönë' le run tsutsu didza'
rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë'
caní ucá'anë' cá'asö Dios Bö' Lá'ayi, Nu ruzá' ladxi' queëru' le riquíniru'.
³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-
la' ruzí' lëbi. Neda' ubi'a quégaca bönachi, rnnë' Xanru'." Lësca' caní
gunné': "Xanru' uchi'a usöröë' bönachi queë'." ³¹ Ral-la' gadxi idzöbi nu
ral-la' si' xíguia' lu në'ë Dios ban.

³² Guli'tsöjné yugu' dza chigula'dödi cate' ni' si' bidxín queëli' bení',
ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi
libí'ili', en bulu'dxía libí'ili' dö' lahui' lógaca bönachi, ate' benli' tsözxón
ca' nupa gula'guí'i gula'zaca' caní. ³⁴ Caní guca, tu' buéchi' ládxi'li' nupa
nadzúngaca lidxi guíë, en lu yöl-la' rudzeja queëli' biá' gulenli' nupa
gula'béaj lídxili' yugu' le guta' queëli'. Caní benli' tu' nózili' nequi

queé'li' le nácarö dxi'a, en le zóatica'sö ni' yehua' yubá. ³⁵ Na'a, biti' ucá'anali' lë na' runli' löza, le naché' tu le zxön ubi'ë Dios queé'li'. ³⁶ Run bayudxi cózali' zxön ladxi', para cate' chibenli' ca ré'ënë' Dios, sí'ili' le guzxí' lu në'ë gunné' queé'li', ca na' nazúaj lu guichi lá'ayi, ca gunné' Dios le rnna:

³⁷ Ia'tú chí'ido'osö idxinë' Bönni' na' ral-la' guídë'.

Biti' ca' tsenë'.

³⁸ Ní'irö nu naca tsahui' lahua' neda',

ulá nu na' tu' réajlë' neda'.

Channö huóaj ladxi', en tá'baga' neda',

bíti'rö tsaz ládxa'a nu na'.

³⁹ Na'a, rë'u ni, biti' nácaru' ca nupa tu'huóaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

Ca naca yöl-la' réajlë' queé'ru' Dios

11 ¹ Na'a, tu' réajlë'ëru' Dios, naca löza queé'ru' sí'iru' le runru' löza, ate' naca bë' zoa le cabí gaca ilé'ëru'. ² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

³ Tu' réajlë'ëru' Dios, réquibe'ëru' benë' Lë' yödzölió ni len didza' bé'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴ Tu' guyéajlë'ë Abel Dios, gulu'ë rön queé'ba' böa' bédxido' lahuë' Dios, tu le nácatërö lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tsahui', en benë' bal lë na' gulu'ë lahuë'. Sal-la' chinátie' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bítirö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxe'ë Dios." ⁶ Na'a, channö cabí réajlë'ëru' Dios, biti' gaca gunru' le raza ládxe'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruí'i ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'eninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupé'ë barco zxön na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzé'ë ladzë' para tsejë' lataj ni' ral-la' sil'ë ca tu le guequi tsaz queë', ate' birúajë' ladzë' sal-la' biti' nózinë' gazxi na' ral-la' tsejë'. ⁹ Tu' guyéajlë'ë Abraham Dios, gúquië' ca tu bönni' zi'tu',

en guzóë' luyú na' Dios guzxí' lu në'ë unödzejë' queë'. Guzóë' lu yu'u guídido', en lébisö ca gulunë' Isaac, en Jacob, zxí'ini xi'sóë' Abraham, nupa ni' guzxí' lu në'ë Dios unödzejë' quéguequi læ na' guzxí' lu në'ë unödzejë' queë' Abraham. ¹⁰ Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzöë' Dios xilibi zö'ö que, ate' gulu'ë le ga na' zoë' Lë cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rna xtídzë'ë na' guzxí' lu në'ë queënu. ¹² Que læ ni na', sal-la' chibigúlädë'ë Abraham, gula'cuá'abi' ziantëröbi' zxí'ini xi'sóë'. Gula'cuá'abi' tsca rö'öba' böläj lúxiba, en tsca rö'ö yuzxi tu ra' nisa zxön, cuntu nu gaca ulaba légacabi'.

¹³ Yúgu'të bönni' ni gulatië', en biti' gula'zi'ë læ na' guzxí' lu në'ë Dios unödzejë' quégaquië', pero gula'yéajlë'ë Dios, ate' zi'tu' zítu'sö bila'lé'enë' læ na' ral-la' ila'zi'ë. Gula'yéajlë'ë Dios, en gulunë' ba nalí que læ ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödzölió ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵ La'tu' gula'zá' ládxi'gaquië' caní que luyú ga ni' bila'rúajë', le nácate ulu'dzölinë' nacxi huóajgaquië' ni', ¹⁶ pero gula'zá' ládxi'gaquië' que luyú na' nácáro dxi'a, le rö' yehua' yubá. Que læ ni na' biti' rutuí'inë' Dios cate' ta'nnë' náquië' Dios quégaquië', tu' chinupë'ë tu yödzö quégaquië'.

¹⁷ Tu' guyéajlë'ë Abraham Dios, cate' guzxí' bë'ë Dios læ', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zítalö queë' na' lahuë' Dios sal-la' nácabi' bi'i na' guzxí' lu në'ë Dios unödzejë' queë'. ¹⁸ Caní benë' sal-la' gudxë' Dios læ', gunné': "Lu ná'abi' bi'i Isaac quiu' ichísagaca'-bi' zxí'ini xi'sú'." ¹⁹ Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

²⁰ Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esau ca zeaj naca le ulu'zítibi' xibé dza si' za'. ²¹ Tu' guyéajlë'ë Jacob Dios, cate' ni' chizóa gátie' gunábinë' Dios gun lá'ayë'-bi' tu tubi' zxí'inë' José, ate' guyéaj ládxë'ë Dios, ni' nayéchuë' lu xiyaga queë'.

²² Tu' guyéajlë'ë José Dios, cate' ni' chizóa gátie', bë'ë didza' que dza na' ila'rúajë' zxí'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

²³ Tu' gula'yéajlë'ë Dios, cate' gúljabí' bí'ido' Moisés, xuz xiná'abi' bulu'cächë'-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'. ²⁴ Tu' guyéajlë'ëbi'

Moisés Dios, cate' guzxönbi', bíti'rö bé'ëbi' lataj nu uzóa lëbi' bi'i bönni' queënu nigula xzí'inë' Faraón, bönni' na' rinná bé'enë' bönachi Egipto.

²⁵ Caní benbi' tu' gúquibi' nácarö dxi'a nu usaca' zi' lëbi' tsözxön len bönachi queë' Dios ca uzí'ibi' xibé tu chí'isö yugu' le tu'zí' xibé nupa tun dul-la'. ²⁶ Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë Dios queëbi'. ²⁷ Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulénë' ca run nu rilé'e Dios, Nu na' biti' gaca ilé'eru'.

²⁸ Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxigaquië', para cabí guti xzí'inigaquië' nu na' ral-la' usuniti yugu' bi'i bönni' zí'alö quégaca bönachi Egipto.

²⁹ Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

³⁰ Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chí'i yödzö na'. ³¹ Tu' guyéajlë'ënu Rahab Dios, nigula ruí'ínu lataj bönachi, biti' gútinu tsözxön len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

³² ¿Bízxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

³³ Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në' le guxí' lu në'ë Dios unödzjë' quégaquië'.

Bulu'sayjë' ruá'agacaba' bëdxi guixi'.

³⁴ Bulu'lé' yugu' lu guí' zxön.

Bila'rúajë' lu ná'agaca nupa gulé'ëni iluti légaquië' len guíë tuchi'.

Dios bunë' légaquië' tsutsu cate' ni' gula'cuídi'në'.

Bulu'huöáquië' ca' tsutsu lu gudil-la.

Bulu'láguië' bönni' guizxi yu röjáquië' gudil-la quégaquië' bönni' zítu'.

³⁵ Yugu' nigula dza ni' bulu'zí'ínu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulé'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. ³⁶ Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë. ³⁷ Bulu'ladxi' bönachi bal-lë' guió, en gula'chözë' ia'bal-lë'.

Gula'zí' bè'è légaquië', en gulútigaca ziángaquie' len guíë tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö'. ³⁸ Caní guláquië' bönni' na', ate' biti' gulaca bönachi yödölió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxa bulóaj, en yugu' yeru luyú. ³⁹ Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guxzí' lu në'ë Dios unödzjë' quégaquië'. ⁴⁰ Caní guca, tu' nupé'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxón.

Ral-la' uyuru'-në' Cristo

12 ¹ Que lë ni na', lësca' rë'u, tu' nacuá' idú gásibi'ilö ga ni zóaru' ziantëro nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazóngaca rë'u, ate' lu yöl-la' riböza zxön ladxi' queëru', ral-la' gunru' xichinë' Dios, le naca tsca xíti'ru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí'i guxzáquë'ë lë'e yaga cruz, en biá' gulënë' yöl-la' rutuí'i que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rë'ë rinná bè'ë.

³ Buli'yúë' Jesús, ca na' gudí'i guxzáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopá ládxi'li'. ⁴ Ga ridxintë na'a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. ⁵ Nadxi ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' xzí'ini cazë', ca na' nazúaj lu guichi le rnnë':

Xzí'ina', biti' uzú' tsölá'alö le gunë' Xanru',
cate' usëdi uzéajni'inë' li',
en biti' huóaj ládxi'u cate' uní'inë' li'.

⁶ Xanru' runí'inë' nu nadxí'inë',
en rusëdi ruzéajni'inë' yúgu'të nupa ta'zí' lu në'e ilaca xzí'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queéli' tsca nácali' xzí'ini cazë'. Biti' ca' zóabi' tubi' bí'ido' biti' uní'inë'-bi' xúzibi'. ⁸ Na'a, channö cabí runí'inë' Dios libí'ili' ca na' runë' quégaca yúgu'të xzí'ini cazë', ní'irö nácali' ca yugu' bi'i lan, en biti' nácali' idú xzí'inë' Dios. ⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnrröru' ca rna xtídzë'ë Xúziru' zoë' yehua' yubá para sóaru' ibanru' tsaz. ¹⁰ Yugu' xuz xiná'aru', tu chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'. ¹¹ Le nácatë biti' nalá' lahui na'a le uzí'iru' xibé que le runí'inë' rë'u, pero run ga

ruhuí'iniru'. Channö güí'iru' lataj usëdi rë'u le runí'inë' rë'u, gun ga cõzaru' dxí'ado', en ga gácaru' tsahui'.

Soa bõnadxi queëru' channö cabí uzé nágaru' chi'ë Dios

¹² Que læ ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxi'li' para gunli' le naca dxi'a. ¹³ Guli'sóa nõza tsahui', para cabí gunli' ga ucá'ana nu ricuidi' ladxi' nõza na', pero guli'gún ga huõaca ladxi' nu na'.

¹⁴ Guli'güí' ládxi'li' cõzalenli' dxi'a yúgu'të bõnachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'.

¹⁵ Guli'gún chi'i cuinli' para cabí soa nu ucá'ana le ruzá' ládxë'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. ¹⁶ Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxí'inë' Isáac. Esaú na' bëti'ë le ral-la' gata' lu në'ë tu' náquië' bi'i bõnni' huaca queë' xuzë' para guzxi'ë tu le do' gudahuë'.

¹⁷ Chinóz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxë'ë xuzë' læ', pero biti' guta' lataj ubí'i ládxë'ë Esaú na' sal-la' gudilaj ládxë'ë le len yöl-la' ribõdxi queë'.

¹⁸ Ca raca queëli' biti' naca ca guca quégaquië' bõnni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böaca chul-la lahui' dza tu' guró'ö böaj gasaj, en guyécjada' bö'.

¹⁹ Bila'yönnë' ta'bõdxi lúzuba' böa', enca' chi'ë Dios Nu bë' didza'. Cate' bila'yönnë' læ ni, guláta'yuë' lahuë' Moisés para cabirö güí'ilenë' Dios légaquië' didza'. ²⁰ Caní gulunë' tu' cabí guca guá' iléngaquië' læ na' gunná bé'enë' Dios légaquië', gunné': "Channö tsöjlíbibá' tuba' böa' guíxi'do'os guí'a ni, ral-la' ulu'ládxië'ë-ba' guiój, o ulu'dödë'-ba' yaga tuchi'." ²¹ Læ na' bila'lé'enë' ben gádxida' légaquië', ate' Moisés gunné': "Radxi ridzóbida', en rizxízida'a."

²² Na'a, libí'ili' ral-la' gádxitërolí' tu' ribíga'li' gala' tu lu guí'a nazí'i le Sión, en ga zoa yödzö queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. ²³ Ribíga'li' gala' ga ni' nudúbigaca zxí'ini cazë' Dios lahuë' Læ', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchí'a rusöróë' yúgu'të bõnachi, en ga na' nacuá' yugu' bö' gulaca cazë' yugu' bõnni' tsahui', tu' bunë' Dios légaquië' tsahui'. ²⁴ Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, læ na' ben ga guchúguië' Dios queëbi' bi'i bóchë'ë.

²⁵ Que læ ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu na' bulidza légaquië'

luyú ni. Nácatërö löza bití' ca' uláru' rë'u channö tá'baga'ru' Nu na' rulidza rë'u, zoë' yehua' yubá. ²⁶ Dza ni' guzxizi luyú ni tu' biyón chi'ë Dios, pero na'a chiguzxí' lu në'ë, gunné': "Ia'tú luzuísö, en calégasö luyú uxízia', pero lúxiba ca' uxízia'." ²⁷ Cate' ni' rnnë': "Ia'tú luzuísö", lë ni ruluí'i rë'u ral-la' udúa yugu' le gaca ila'zxízi, lë na' rë'ö yödzölió ni, ate' ulu'gá'ana le cabí gaca ila'zxízi, lë na' rë' yehua' yubá. ²⁸ Que lë ni na', tu' ral-la' idéli'ru' tu lataj ga inná bé'ëru', le cabí izxizi, ral-la' guiëru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj ládxi'ru' Lë' ca na' raza ládxë'ë Lë', ²⁹ tu' náquië' Dios queëru' ca tu guí' le rusuniti le cabí naca idú tsahui'.

Le ral-la' gunru' le raza ládxë'ë Dios

13 ¹ Ral-la' idxí'itica'sili' luzá'ali' tuli' ia'tuli'. ² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' bití' guléquibe'e nácaquië' gubáz lá'ayi.

³ Guli'tsöjné nupa nadzúngaca lidxi guíë tsca nunli' légaquië' tsözxón, nadzunli' ca' lidxi guíë. Guli'güí' ládxi'li' yugu' bönni' ta'bía ládxi'gaca bönachi légaquië', tsca libí'ili' riguí'i rizáca'lenli' légaquië' tsözxón.

⁴ Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵ Bití' bi uhuídi'li', pero guli'tsaza ládxi'li' tsca le dë queéli' na'a, tu' chigunnë' Dios: "Catu caz ucá'ana' li', en bití' ca' ubéaj ládxa'a li'."

⁶ Caní naca, huáca innaru' idú ládxi'ru' lë na' rnna:

Xanru' náquië' Nu rácalen neda'.

Bití' ca' gádxida' bi gun bönachi quia'.

⁷ Guli'tsöjné yugu' bönni' tu'yüë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸ Lébisö ca náquië' Jesucristo, néaje, en na'a, en cá'tica'sö. ⁹ Bití' güí'ili' lataj yugu' xibá izá'a, en xibá nadzá' iché'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxë'ë Dios queéli', en calëga ca náca gaca xibá que le rë'aj ráguru', lë na' bití' ulu'zí' xibé nupa tuí'i ládxi'gaca léguequi.

¹⁰ Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. ¹¹ Bixúz lo que yu'u lá'ayi na' gulu'ë xichóngacaba' böa' bëdxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'ilö ra' yödzö. ¹² Lësca caní gudí'i guzxáquë'ë Jesús ní'ilö ra' yödzö para bunë' bönachi dxi'a len rön queë cazë'. ¹³ Tsöjtá'aru'-në' Jesús, sal-la' ila'béaj bönachi rë'u lu yödzö, en sí'iru' tsözxón len Lë' lë na' bulu'lidza ditaj bönachi Lë'.

¹⁴ Biti' zoa tu yödzo queëru' yödzölió ni le soa tsaz, pero riguíljaru' lë na' si' za'. ¹⁵ Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiéru'-në' Dios: "Xclenu'" ni'a que le náquië' Lë'. ¹⁶ Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxi'ë Lë'.

¹⁷ Guli'gún ca rnna xtídza'gaquië' bóchi'ru' tu'yúë' libí'ili', en guli'güí' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxí' quégaquië', tu' cabí uzí'ili' xibé dxin na' ilunë' lu yöl-la' risëbi ladxí' quégaquië'.

¹⁸ Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ruí'i ládxi'tu' gúntica'situ' le naca dxi'a. ¹⁹ Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayóntë.

Dios uzá' ládxi'ë queëru' le gácalen rë'u

²⁰ Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, ²¹ rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'ënë' Lë', ate' gunë' queéli' le raza ládxi'ë Lë', tu' néquili' queë' Jesucristo. ¡Queë' Cristo gácatíca'sö yöl-la' ba! ¡Ca' gaca!

²² Ráta'yua' loli', böchi' luzá'ado', güí'i ládxi'li' didza' ni ruzéajni'i libí'ili', tu' naca láti'do'os lë ni ruzúaja' queéli'. ²³ Ral-la' inózili' chiburúajbi' bi'i Timoteo, bi'i bóchi'ru'do', lidxi guíë, ate' channö idxíntëbi' ga zoa' ni, gunbi' neda' tsözxón uduyútu' libí'ili'.

²⁴ Buli'gapa Dios bóchi'ru' tu'yúë' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlë' Cristo nacuá' luyú Italia.

²⁵ ¡Dios uzá' ládxi'ë queéli' yúgu'tëli'! ¡Ca' gaca!